

1920թ. ամառը Հայաստանը բաժանուած էր 4 նահանգապետութիւնների: 1) Արարատեան՝ նահանգապետ ներքին գործոց նախարարի օգնական Ս. Թորոսեան, օգնական՝ Լ. Ամիրխանեան, 2) Շիրակի՝ նահանգապետ Կ. Սասունի, 3) Վանանդի՝ Ստ. Ղորղանեան, 4) Սիւնեաց՝ Ս. Մելիք-Եօլչեան, իսկ նրա հրաժարականից յետոյ՝ Զ. Եօլչեան: Նահանգները իրենց հերթին, բաժանուած էին գաւառների: Վարչութիւնը կազմակերպուած, հետզհետէ բարելաւուած ու կատարելագործուած էր, թէև մայիսեան շարժումներն ու թրքական շրջանների դէպքերը մեծապէս դժւարացնում էին կեանքի և պետական մեքենայի կարգաւորումը:

Այս դէպքերը խորապէս անդրադառնում էին և գաւառական ինքնավարութիւնների գործունէութեան, բայց, մանաւանդ, երկրի ելեմտական վիճակի վրա:

Ճիշտ է, Զանգիբասարի և Շարուրի գրաւումը մեծարժէք հարստութիւններ տւեց կառավարութեան ձեռքը: Այսպէս, Շարուրի գրաւումից անմիջապէս յետոյ գիւղատնտեսական նախարարութեան վիճակագրական բաժինը այնտեղ ուղարկեց վիճակագիրներ՝ Բ. Իշխանեանի անձնական հսկողութեան տակ: Եւ թէև հաւաքուած տեղեկութիւնները լրիւ չէին, բայց ստացուած թւերը հարստութեան մեծ պաշար էին ցոյց տալիս:

Շարուրում կար 70 դիւղ, որոնցից 6 հայկական և 1 ասորական. մնացեալը՝ թուրք: Բնակիչների թիւը հաւասար էր 90 հազարի, որից հայերը, բացառութեամբ 30 ընտանիքի, սրի էին քաշուած դեռ 1919-ի նահանջի ժամանակ:

1919թ. աշնանը և 20-ի գարնանը Շարուրում ցանկել էր 300,000 փութ ցորեն, 150,000փ. դարի, 50,000փ. չալթուկ (բրինձ), 4000փ. վարսակ, 1000փ. եգիպտացորեն, 500փ. կորեկ, 1000փ. սիսեռ, 1000փ. սեխ ու ձմերուկ, 200փ. լոբի, 200փ. սոխ, 20փ. ոսպ, 7փ. ծխախոտ — ընդամենը՝ 507,927 փութ սերմացու:

Բերքը եղել է չափից աւելի առատ և մօտաւոր հաշուով սեխ ու ձմերուկ 10,000,000 փութ. ցորեն 3,500,000փ., դարի 1,500,000փ., կորեկ 20,000 փութ, վարսակ 20,000փ., եգիպտացորեն 25,000փ., սոխ 50,000փ., սիսեռ 25,000փ., լոբի 10,000փ., ոսպ 1,000փ., ծխախոտ 2,000փ., ընդամենը 15,153,000 փութ: Այս թւի վրա պէտք էր աւելացնել և չալթուկի բերքը, որ հաւաքուած չլինելու պատճառով կարելի չէր չափորոշել, բայց որի քանակը շատ խոշոր էր: Պէտք էր աւելացնել և 500,000փ. տանձ, 80,000փ. ինձոր, 60,000փ. դեղձ, 25,000փ. սալոր և այլն:

Նման առատութիւն էր տիրում և Զանգիբասարում, ուր միայն բրնձի քանակը հաշուում էր մօտ 400,000 փութ:

Բայց այս հարստութեան մեծ մասը չմտաւ պետութեան պահեստները, այլ, զանազան ձևերով, անցաւ ժողովրդի ձեռքը, մասամբ դարձաւ չարահաճութեան նիւթ կամ փչացաւ: Կառավարութիւնը աշխատեց կազմակերպել լքուած հարստութիւնների օգտագործումը, գործի կանչեց հմուտ ու բարե-